

## La Lettre Jèrriaise Sanm'di lé vîngt-quatre du mais d'Janvyi 2026.

Bouônjour bouonnes gens. Ch'est Jean L'Maistre dé L'Êta tch'a l'pliaîsi d'vos présenter la lettre Jèrriaise aniet, Sanm'di lé vîngt-quatre du mais d'Janvyi, deux mille vîngt-six. J'espéthe qu'ous avez ieu un bouôn temps aue vos fanmil'yes et vos anmîns à Noué et sans doute alentou du Nouvel An.

Nos v'là déjà bein lanchis dans l'mais d'Janvyi et quand lé solé est bein sorti tard l'arlévée, nous peut apprêcyi qué les jours s'allouongnent. Bein seux, ch'est lé moment quand la s'menche dé patates sort des hangars pour la pliant'tie. Ch'est un travas hardi pénibl'ye sustout pour les siens qu'ont ma dans l'dos. Au jour d'aniet il' ont des grandes machinnes et les plianteurs sont assis tout prés d'la terre pour né pas bûchi les jets d'patates tchi sont hardi d'licats. Ichîn à l'Êta j'avons eune merveilleuse veue et nou peut observer toutes les machinnes pour griffonner, touônner, planter et finni par couvri les rangs d'patates aue un film dé chu maûdit pliastique.

Quand j'pense au temps pâssé sustout dans l'Hivé, comment qué tant d'choses ont changi. Par exempl'ye j'avons la mâjorité dé la populâtion aue lé caûffage central dans lus maîsons. Tchi confort! Quand lé solé est dêhalé ichîn à L'Êta, parfois i' faut arrêter lé caûffage pa'ce qu'i' fait trop caud! (l') faut bein admettre qué ch'la s'arrive sustout au c'menchement dé l'Hivé et au R'nouvé étout!

J'voudrais mentionner qué j'avons ieu les jannes mousses à prendre part dans L'Eisteddfod chute sémaine à la Salle Pârrouaîssiale dé Saint Ouën. Ch'est l'tou ès adultes aniet, actuellement à ch't'arlévée. Pouortchi pon v'nîn les écouter? J'sis seux qu'i' s'saient bein contents dé vos vaie.

Ch'est ch't'année, au mais d'Juîn, qué j'allons aver les élections. J'allons èrtouônner les Sénateurs et j'pense qué j'allons aver neu nouveaux Sénateurs élus par toute l'Île. Dé chein qué j'en comprends, chaque district s'en va pèdre un Député pour pouver gângni les neu Sénateurs. (l') faut espéther qu'un tas d'monde voudrons voter et qué j'éthons dé bouôns candidats pour chaque poste.

J'mé rappelle qué quand lé Sénateur Cyril Lé Marquand 'tait Président du Conmité des Finances, dans l'temps du budget, i' nos disait tréjous d'être souongneusement à dgetter les nouages pa'ce qué i' y'a tréjous des nièrs nouages muchis un mio pus bas qué l'horizon.

Lé pouôrre Sénateu s'i' 'tait ichîn achteu, i' n'pouôrrait pon compter touos les nièrs nouages tchi sont si visibl'yes et sans doute, les nouages tchi sont au liain. Faut don, vivre en espéthance, qué ches nouages-là, restent au liain et qué les dgèrres cèssent au pus vite!

Eh bein bouonnes gens, n'en v'là assez pouor chute semaine. Mèrcie pouor m'aver écouté à matîn. Restez sauf, et à la préchaine.